

Dithero tsa Tirelano mo Kutlwanong

54/2013 Thero ka Sontaga o o latolang o o latolang wa bofelo morago ga moletlo wa Borarobongwe, e le ka 10. 11. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 327 - 302/310

2. **Thapelo:** Morena, Modimo, Rara yo o mo legodimong, le kajeno re fa pele ga gago go utlwa Lefoko la gago. E tla re fa re le utlwa, o re fe Mowa o o Boitshepo wa gago gore o didimatse dilelo, dingongorego, dikhutsafalo tsa rona ka go utlwisiwa botlhoko ke baatlhodi le bagolo ba ba neng ba sa re atlholele go sa tlhokomele ditshiamelo tsa rona, o di didimatse ka go re thusa gore re nne re solofele, re ikaege ka go gopola ka metlha, fa o tla atlholela baitlhaolelwi ba gago ba ba go tliaeletsang bosigo le motshegare, o re thuse, re se lape go re kaela ka Lefoko la gago, mme re rapele ka metlha, re itshwarelele le mo tumelong gore fa Morwao a bowa ka letsatsi la bofelo, a re fitlhele re mo lebeletse, re tsene le ene mo botshelong jo bo sa khutleng. Amen.

3. Epistolo ka fa thulaganyong ya 2 e kwadilwe mo go Baroma 14:7-9.

Efangele ka fa thulaganyong ya 1 e kwadilwe mo go Luka 17:20-30.

4. A go ipolelwe tumelo ya bokeresete!

5. Sefela sa 332 - 307/315

6. Thapelo ya mmadi wa thero.

7. **Efangele** ka fa thulaganyong ya 5 e kwadilwe mo go Luka 18:1-8, e re: "Jesu o ne a bua le barutwa ba gagwe ka setshwantsho sa gore motho o tshwanetse go rapela ka metlha, a sa lape, a re: 'Go ne go le moatlhodi mo motseng mongwe yo o sa boifeng Modimo, le motho a sa re sepe ka ene. Mo motseng oo go ne go le motlholagadi yo o neng a ntse a tla kwa go ene a re: Ntsheka mo moganetsing wa me! Mme a gana sebaka se seleele; morago ga moo a akanya a re: Le fa ke sa boife Modimo, le motho ke sa re sepe ka ene, le fa go ntse jalo, ka motlholagadi yo a ntapisa, ke tla mo seka gore a se ka a mphatlola tlhogo ka go boaboa ga gagwe.' Morena a ba a re: 'Lo utlwile se moatlhodi yo o sa siamang o se buileng. A Modimo ona ga o nke o atlholela

baitlhaolelwi ba ona ba ba o tlhaeletsang bosigo le motshegare, gongwe a o ka ba diegela? Ke lo raya ke re: O tla ba atlholela ka bonako. Fela a e tla re Morwa-Motho a tla, a fitlhele tumelo mo lefatsheng?” Amen.

8. Thero: Barategi mo Moreneng wa rona Jesu Keresete, ba bantsi jang batlholagadi ba ba tshwenyegileng jaaka motlholagadi yo Morena a buang ka ga gagwe mo setshwantshong sa lefoko la thero ya kajeno! Ba bantsi jang bahumanegi ba ba lelang ka ntlha ya barena ba ba ba siamololelang, le ba ba ganang go ba utlwa, fa ba le ba tlalelong! Ba bantsi jang ba ba itirang baatlhodi ka go supa le go atlhola bone ba ba siamololetseng bapitlaganyi, ba latlha baatlhodi ba ba ganang go ba seka jaaka moatlhodi yo o diegileng mo go kalo go seka motlholagadi mo setshwantshong sa lefoko la thero ya kajeno.

Jaanong re utlwang? Morena a reng ka ga moatlhodi yole? A re: E ne e le moatlhodi “yo o sa boifeng Modimo, le motho a sa re sepe ka ene.” Morena ga a diege mo polelong ya setshwantsho sa Lefoko la thero ya kajeno ka go tshwaya katlholo e moatlhodi yo o maswe yo a tla atlholwang ka yona. Ka setshwantsho se Morena a se bolelang o rata go re bolelela tse dingwe. A re tlhokomeleng tse a di re bolelelang ka setshwantsho sa moatlhodi yo o sa siamang. Ke tse:

1. a re: Motho o tshwanetse go rapela ka metlha, a sa lape.
2. A re: Modimo o tla atlholela ba ba pitlagantsweng ka bonako.
3. A re: Re itshokele mo tumelong go ya mo bofelong.

1. Morena o a ruta ka sekao sa motlholagadi yole gore re rapele ka metlha, re sa lape. Motlholagadi yole o ne a ntse a ya mo moatlhoding yole yo o neng a gana go mo seka. Ga re bolelelwe gore o ne a batla tsheko mo moatlhoding ka ntlha ya tlalelo e e ntseng jang. Mme re ka gopola ka dikao tse dintsi ka fa batlholagadi mo ditshikeng tsa rona ba siamololetsweng ka teng ke ba losika lwa monna wa gagwe yo o tlhokafetseng. Ka motlholagadi yoo a ne a ntse a sa lape, mme a itshoka tota, a ntse a boela mo moatlhoding go mo kopa gore a mo seke, o mo fentse gore a mo thuse mo bofelong. Ga re utlwe, fa a ne a ya go batla thuso ka tsela e e sa tsamaelaneng le ditaolo tsa Modimo, jaaka go diragala gantsi, fa ba ba pitlagantsweng ba leka go iphemela ka tse di latlhwang ke Modimo. Morena o rata gore re nne re tswelele fela go rapela, re se ka

ra lapa. Ke gore re tswelele go rapela, re se ka ra leka go ipusolosetsa mo go ba ba re siamololelang, mme re ise re atamele fa pele ga sefatlhego sa Morena, re itshwarela yo o re leofetseng, le go re direla bosula. Re kgone go dira jalo ka go tiia mo tumelong ka go dumela se re se bolelelwang ka thuto ya bobedi ya lefoko la thero ya kajeno, e e reng:

2. Modimo o tla atholela ba ba pitlagantsweng ka bonako. Lefoko la thero le re: "A Modimo ona ga o nke o atholela baitlhaolelwi ba ona ba ba o tlhaeletsang bosigo le motshegare, gongwe a o ka ba diegela?" A re ikanyeng Modimo, re se ka ra belaela, le e seng go leka go mo pateletsa ka dithapelo go betsa ba ba re siamololeditseng, le e seng go leka go ithusa ka go ipaakanyetsa kgololo mo dipitlaganong tsa rona ka go fapaana le thato ya Modimo. Modimo ga o batle gore re ipusolosetse, mme o rata gore re itshoke, re letele thuso ya ona, re nne re ikanye tsholofetso ya ona, fa o tla thusa ka nako ya ona ka thuso ya nnete, le fa re gopola mo moweng, fa a diega mo go maswe ka thuso ya ona. O tla re atholela tshiamo ya yona ka go amogela tsholofetso ya ona e e reng: O re balela tshiamo ya ga Jesu Keresete e re e baakanyeditsweng ke ene ka loso le tsogo ya gagwe.

3. Mo kgatong ya bofelo ya lefoko la thero ya kajeno Jesu o a botsa, a re: "Fa a e tla re Morwa Motho a tla, a fitlhele tumelo mo lefatsheng?" Ka potso eo Morena Jesu o rata go re tsoseletsa rotlhe, gore re se lape mo thapelong, le e seng mo tseleng ya go mo sala morago, le e seng mo tumelong, mme re itshoke, re tlhomame mo tumelong go ya mo bofelong. Go gongwe o bua ka ga dipitlagano tsa sebaka sa bofelo, a re: "Mme fa malatsi ao a ka bo a sa khutshwafadiwa, go ka bo go sa pholosiwe motho ope; mme malatsi ao a tla khutshwafadiwa ka ntlha ya batlhaolwi," Math. 24:22. O re boleletse. A re tlhokomeleng, re se tshameke ka tseo, mme re tswelele go rapela, bogolo ka go kopa gore Morena a se ka a lapa go re kaela ka Lefoko la gagwe, le go re tiisa mo tumelong ka go re laletsa ka metlha go atamela mo boipobolong le mo selalelong go tiisiwa mo tumelo. Fa re itshwarelwa maleo otlhe ka ntlha ya loso le tsogo ya gagwe, ka boitshwarelo joo re tsoselediwa go itshwarelana le ba ba re leofetseng, le go direlana molemo le bone. Morena yo o molemo ke yo! Ga a didimale, o re bolelela tse re di diretsweng ke ene le tse a di batlang mo go rona ka lefoko la thero ya kajeno gore re nne re rapele ka metlha, re nnele ruri mo tumelong. Amen.

9. **Thapelo:** Morena Modimo, Rara wa legodimo, Mong-wa-thata-yotlhe, re lebogela Lefoko la gago le o re fileng kajeno. Ke wena yo o re rutileng gore re rapele, re kope mo go wena, fa re pitlaganngwa ke batho, wa re solofetsa gore o tla utlwa dithapelo tsa rona ka ntlha ya ga Jesu Keresete. Morena Jesu Keresete, re a leboga, ka o re kaetse sešwa kajeno ka Lefoko la gago gore re se lape, mme re rapele ka metlha, re itshwarelele mo tumelong go ya bosakhutlneg. Amen.

Thapelo ya Morena: Rara yo o mo legodimong ...

10. Sefela sa 352 - 321/333

A kagiso ya Modimo e e fetang tlhaloganyo yotlhe e boloke dipelo le maikutlo a lona mo go Jesu Keresete, Morena le Mopholosi wa rona. Amen.

Thero eno e kwadilwe ke E. A. W. Weber, ka ngwaga wa 2013

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.